

四庫全書

子部

欽定四庫全書

子部  
說郛卷六十二上

詳校官庶吉士<sub>臣</sub>陳若霖

員外郎<sub>臣</sub>牛綏文覆勘

總校官編修<sub>臣</sub>倉聖脉

校對官助教<sub>臣</sub>金學詩

謄錄監生<sub>臣</sub>觀音保

欽定四庫全書

說郛卷六十二上

元 陶宗儀 撰

雲南志畧

李京

雲南上世無可稽考按華陽國志楚威王遣莊蹻略地巴黔伐夜郎抵牂牁西至滇池會秦奪楚黔中地不得歸遂畱王滇池雲南通中國自此始漢武帝開楚道通西南夷元狩元年使呂越人等往身毒國至滇滇王留使者四歲使者還言滇大國元鼎五年發巴蜀罪人及

八校尉兵伐之南人震恐請置吏遂立越雋郡後諷滇王入朝不聽元封二年發巴蜀兵征之滇王降以滇為益州地節二年復叛以金城司馬陳立為牂牁太守平之明帝永平元年諸部悉反以安漢侯張翕討之度蘭滄江置永昌郡以廣漢鄭純為永昌太守元初四年越雋反諸部皆應之詔益州刺史張喬討之叛酋封離等詣喬陳叛亂之由乞降喬厚加慰納奏長吏姦猾侵犯蠻境者凡十餘人皆斬之三十六部聞之悉來內附蜀

建興三年諸葛亮南征聞孟獲為夷漢所服募生致之  
凡七縱七擒獲曰公天威也南人不復反矣諸部悉平  
亮即其渠帥而用之或以諫亮亮曰若留外人而無兵  
必成禍患今吾欲不留兵運糧紀綱粗定夷漢粗安于  
是悉收豪傑以為官屬出其金銀丹漆牛馬以給軍國  
之用終亮之世夷不復反晉武帝以天水李毅為南蠻  
校尉統五十八部毅卒寧州夷叛救援莫至毅女秀明  
達有父風衆推秀領寧州事嬰城固守城中糧盡掘鼠

而食伺夷稍怠輒出擊之終得保完今有廟在晉寧州武帝時以爇深為興古太守今曲靖也爇人之名始此齊永明中以陳顯達為益州都督顯達一目爇人慢之顯達遣使責其租稅獠帥曰兩目刺史尚不能調況一目耶遂殺其使顯達分遣將帥聲言出獵夜往襲之無少長盡殺之蠻夷震服梁武帝大同三年武陵王紀都督益州先是蜀亂建寧越雋之地累朝不能有至紀開越雋通建寧貢獻方物十倍前人以爇瑣為南寧州刺

史隋開皇中以史萬歲南征蠻夷皆降師還復叛蜀王  
秀奏萬歲貪賂致生邊患萬歲以罪廢乃以梁毗為南  
寧州刺史諸酋相率以金遺毗毗置金坐側對之慟哭  
曰此物饑不可食寒不可衣汝等以此相殘何為今將  
此來欲殺我也耶一無所取蠻酋大悅唐武德元年以  
樊弘達為毗州刺史開元中以鬼王樊歸玉為寧州都  
督初蠻酋張氏名仁果時當漢末居蒙舍州為在諸部  
之南故曰南詔詔漢語國君也傳三十三主至樂進永

為蒙氏所滅蒙氏名細奴羅城蒙舍龍之子圖而都之  
國號大蒙自稱奇王雲南建國稱王始此唐貞觀三年  
也在位二十一年子羅盛立是為興宗王始用三軍景  
雲元年御史李知古請兵伐南詔南詔臣伏知古增置  
郡縣而重賦之諸部皆叛殺知古以其尸祭天羅盛在  
位二十七年盛子羅皮立是為太宗王始得意于六詔  
蒙氏居蒙舍川號蒙舍詔施望大據石和城號施浪詔  
豐咩據遼啖川號遼啖詔豐時據浪穹號浪穹詔波衝



據越析川號未幾詔輔原羅據越雋號蒙雋詔是為六  
詔開元二年遣其相張建成入朝玄宗厚禮之賜浮屠  
像雲南始有佛書在位三十七年子皮羅閣立賂劍南  
節度使王昱求合六詔朝廷從之封大酋帥越國公雲  
南王賜名歸義盡有雲南之地自是以後不可復制在  
位五十年禪其子閣羅鳳是為武王改元曰建鍾靈南  
改元始此閣羅鳳妻女嘗謁都督張虔陀虔陀皆通之  
且多求乞閣羅鳳不勝其忿遂發兵反攻陷姚州殺虔

陀唐以劔南節度使鮮于仲通將兵八萬討之蒙使行  
成弗許及戰仲通大敗僅以身免閣羅鳳乃結知吐蕃  
刻石于龍尾閣明其不得已叛唐之意天寶十三年劔  
南留後李宓將兵七萬致討閣羅鳳誘之全軍以沒唐  
益發兵竟不克前後死者二十餘萬人在位二十年禪  
其子鳳迦異自號主父居太和城鳳迦異立是為悼惠  
王改元長壽徙都鄙闡在位十一年子異牟尋立是為  
孝恒王改元建龍制清平官以下十司給服祿徙都苴

咩城封點蒼山為中岳遣烏蠻鬼主孟衡苴來朝復臣  
于唐與劔南西川節度使韋臯連兵伐吐蕃大破之取鉄  
橋等三十五城在位三十年子尋閣劬立是為孝惠王  
改元應道在位三年子劬龍晟立是為幽王改元龍興  
淫虐不道弄權節度蒙苴顛弑之在位五年弟勸劬利  
立是為靖王改元全義在位八年弟劬豐佑立是為成  
昭王改元保和又改天啓唐太和二年蠻有學書子弟  
在成都者盡得蜀之虛實遣清平官蒙苴顛大舉入寇

取邛戎爲三州遂入成都掠子女百工數萬人南歸  
在位三十六年子世隆立始僭帝號改元建極遣清平  
官董成入朝于唐受敵國禮而還九年遣楊酋慶歸所  
俘三千人唐殺酋慶十年世隆自將侵蜀遂破成都自  
是大渡河以南盡屬蒙矣在位十八年殂于越雋謚景  
莊子法堯立改元貞明嬖崑崙女失道豎人楊定趙登  
弑之在位二十年子舜化立改元中興在位三年布燮  
鄭買嗣篡之國滅蒙氏自細奴羅至舜化共十三主合

二百四十七年即唐光化二年也買嗣唐西瀘令鄭回之後閻羅鳳陷雋州得回以為清平官遷侍中至買嗣漸盛竟至于篡買嗣易名昶國號大和改元安國在位九年子仁昊立凡五改元曰孝治天瑞安和眞佑初歷在位十八年侍中趙善政篡之善政立國號興元改元應天歷二年劔川節度使楊干真殺之干真國號義寧改元曰光聖曰皇興曰大明曰鼎新曰建國凡九年通海節度使段思平滅之時晉天福三年也思平蒙氏清平

官忠國六世孫布燮保隆之子國號大理改元文德都  
苴咩城在位八年號太祖先帝宋太祖建隆三年王全  
斌克蜀欲因取雲南太祖止之曰德化所及蠻夷自服  
何在用兵于是開邊之釁息矣子思英立改元文經在  
位一年遜位為僧思平母弟忠胄立改元主治在位五  
年殂謚文武先皇子思聰立改元明德又改廣德聖德  
在位十七年子秉英立改元曰廣明又改曰明應明聖  
明治明統在位二十五年子秉肅立改元明啓在位十

三年秉英之孫秉隆立改元明通在位五年遜位為僧  
秉廩之子秉真立改元政治在位一十六年秉英之孫  
秉興立改元聖明在位三年思平五世孫思廩立改元  
曰保安太安政安正德保德在位三十年子廉義立改  
元上德在位七年遇弑思平五世孫暉受立改元上明  
在位一年思廩之孫政明立改元曰保定建安天祐在  
位十六年遜位于鄆闡岳牧高泰昇昇立改元上治國  
號大中歷二年殂子孫不敢繼復歸段氏政明之子政

淳立改元天授明開天政文安在位十三年子政嚴立  
改元日新文治永嘉天保廣運在位四十年子政興立  
改元永真天保龍興聖明建德在位二十六年子政智  
立改元利貞盛德嘉會元亨安定在位二十九年子智  
廉立改元鳳歷元壽在位六年子智祥立改元天開天  
輔仁壽在位三十四年子祥興立改元道隆在位十六  
年子興智立改元天定是歲壬子越明年欽遇我世祖  
皇帝由吐蕃麗江入興智舉國出奔至鄯闡被擒段氏



自思平至興智共二十二主合三百一十六年甲寅春  
大駕東還命大將烏蘭濟達專行征伐三十七部及金  
齒交趾舉皆內附雲南悉平烏蘭濟達回師之後委任  
非人政令屢變天庭高遠不相聞知邊鄙之民往往復  
叛迨至元甲戌以平章賽音迪延齊行省雲南下車之  
日立州縣均賦役興水利置屯田擢廉能黜汙濫明賞  
罰恤孤貧秉政六年民情丕變政令一新而民不知擾  
及薨之日遠近聞之如喪父母于時公于內庭眷顧甚

重凡屬職除授及南方便宜無不俞允而公亦開誠布  
公寬大廉簡故能上下感戴聲名洋溢後之繼者雖有  
善政莫能及也嗚呼雲南自古為蠻獠之域秦漢以來  
雖略通道然不過發一將軍遣一使者以鎮遏其相殘  
慰喻其祈懇而已所任得人則乞憐效順任非其人則  
相率以叛羈縻苟且以暨于唐王師屢覆而南詔始盛  
天寶以後值中原多故力不暇及五季擾亂而鄭趙楊  
氏亦復攘據宋興分于遼夏未遑遠略故蒙段二姓與

唐宋相終始天運勃興文軌混一欽惟世祖皇帝天戈一指盡六朝之地皆為郡縣迄今吏治文化侔于中州非聖化溥博何以臻此而輿地風物未至紀錄實為缺典今撮其古今廢置人物山川等類為一編甚懼未能周知悉覽然其大略亦足以提挈一方之要領云



桂海虞衡志序

始余自紫薇垣出帥廣右姻親故人張飲松江皆以炎  
荒風土為戚余取唐人詩考桂林之地少陵謂之宜人  
樂天謂之無瘴退之至以湘南江山勝於驂鸞仙去則  
宦遊之適寧有踰於此者乎既以辭親友而遂行乾道  
八年三月既至郡則風氣清淑果如所聞而巖岫之奇  
絕習俗之醇古府治之雄勝又有過所聞者余既不鄙  
夷其民而民亦矜予之拙而信其誠相戒毋欺侮歲比

稔幕府少文書居二年余心安焉承詔徙鎮全蜀亟上  
疏固謝不能留再閱月辭勿獲命乃與桂民別民觴客  
於途既出郭又留二日始得去航瀟湘絕洞庭沂灝潁  
馳驅兩川半年達于成都道中無事時念昔游因追記  
其登臨之處與風物土宜凡方志所未載者萃為一書  
蠻陬絕徼見聞可紀者亦附著之以備土訓之圖噫錦  
城以名都樂國聞天下余幸得至焉然且惓惓於桂林  
至為之綴緝瑣碎如此蓋以信余之不鄙夷其民雖去

之遠且在名都樂國而猶弗忘之也淳熙二年長至日  
吳郡范成大致能書





桂海虞衡志目錄

志巖洞

志金石

志香

志酒

志器

志禽

志獸

志蟲魚

志花

志果

志草木

雜志

志蠻

桂海巖洞志

范成大

余嘗評桂山之奇宜為天下第一士大夫落南者少  
往往不知而聞者亦不能信余生東吳而北撫幽薊  
南宅交廣西使岷峩之下三方皆走萬里所至無不  
登覽太行常山衡嶽廬阜皆崇高雄厚雖有諸峯之  
名政爾魁然大山峯云者蓋強名之其最號奇秀莫  
如池之九華歛之黃山括之仙都溫之鴈蕩夔之巫  
峽此天下同稱之者然皆數峯而止爾又在荒絕僻

遠之瀕非凡杖間可得且所以能拔乎其萃者必因  
重岡複嶺之勢盤亘而起其發也有自來桂之千峯  
皆旁無延緣悉自平地嶄然特立玉筍瑤簍森列無  
際其怪且多如此誠當為天下第一韓退之詩云水  
作青羅帶山如碧玉簪柳子厚訾家洲記云桂州多  
靈山發地峭竪林立四野黃魯直詩云桂嶺環城如  
鴈蕩平地蒼玉忽嵯峩觀三子語意則桂山之奇固  
在目中不待余言之贅頃嘗圖其真形寄吳中故人

蓋無深信者此未易以口舌爭也山皆中空故峯下  
多佳巖洞有名可紀者三十餘所皆去城不過七八  
里近者二三里一日可以徧至今推其尤者記其畧  
讀書巖在獨秀峯下直立郡治後為桂主山傍無坡阜  
突起千丈峯趾石屋有便房石榻石牖如環堵之室顏  
延年守郡時讀書其中

伏波巖突然而起且千丈下有洞可容二十榻穿鑿通  
透戶牖傍出有懸石如柱去地一線不合俗名馬伏波

試劍石前浸江濱波浪洶湧日夜漱齧之

疊綵巖在八桂堂後支徑登山大半有洞曲轉穿出山背

白龍洞在南溪平地半山中龕有大石屋由屋右壁入洞行半途有小石室

劉仙巖在白龍洞之陽仙人劉仲遠所居也石室高寒出半山間

華景洞高廣如十間屋洞門亦然

水月洞在宜山之麓其半枕江天然剏刻作大洞門透徹山背頂高數十丈其形正員望之端整如大月輪江別派流貫洞中踞石弄水如坐捲蓬大橋下

龍隱洞龍隱巖皆在七星山脚沒江水中泛舟至石壁下有大大洞門高可百丈鼓櫂而入仰觀洞頂有龍跡夭矯若印泥然其長竟洞舟行僅一箭許別有洞門可出巖在洞側山半有小寺即巖為佛堂不復屋

雄巖亦江濱獨山有小洞洞門下臨灘江

立魚峯在西山後雄偉高峻如植立一魚餘峯甚多皆  
蒼石刻峭

棲霞洞在七星山七星山者七峯位置如北斗又一小  
峯在傍曰輔星石洞在山半腹入石門下行百餘級得  
平地可坐數十人傍有兩路其一西行兩壁石液凝沍  
玉雪晶熒頂高數十丈路闊亦三四丈如行通衢中頓  
足曳杖鏗然有聲如鼓鐘聲蓋洞之下又有洞焉半里  
遇大壑不可進一路北行俯俚而入數步則寬廣兩傍



十許丈鍾乳垂下累累凡乳牀必因石脈而出自頑石出也進里餘所見益奇又行食頃則多岐遊者恐迷途不敢進云通九疑山也

元風洞去棲霞傍數百步風自洞中出寒如冰雪

元字胡涓

切

曾公洞舊名冷水巖山根石門砢然入門石橋甚華曾丞相子宣所作有澗水莫知所從來自洞中右旋東流橋下復自右入莫知所往或謂湫流入于江也度橋有

仙田數畝過田路窄且濕俯視石罅尺餘匍匐而進旋復高曠可通棲霞

屏風巖在平地斷山峭壁之下入洞門上下左右皆高廣百餘丈中有平地可宴百客仰視鍾乳森然倒垂者甚多躡石磴五十級有石穴通明透穴而出則山川城郭恍然無際余因其處作朝天觀而命其洞曰空明

隱山六洞皆在西湖中隱山之上 一曰朝陽 二曰夕陽 三曰南華 四曰北牖 五曰嘉蓮 六曰白萑 泛湖泊舟自

西北登山先至南華出洞而西至夕陽洞窮有石門可  
出至北牖出洞十許步至朝陽又西至北牖穴口隘狹  
側身入有穴通嘉蓮西湖之外既有四山巉巖碧玉千  
峯倒影水面固已奇絕而湖心又浸陰山諸洞之外別  
有奇峯繪畫所不及荷花時有泛舟故事勝賞甲於東  
南

北潛洞在隱山之北中有石室石臺石果之屬石果作  
荔枝胡桃棗栗之形人采取玩之或以飭盤相問遺

南潛洞在西湖中羅家山上

佛子巖亦名鍾隱巖去城十里號最遠一山岑起莽蒼  
中山腰有上中下三洞下洞最廣中洞明敞高百許丈上洞  
差窄一小寺就洞中結架因石屋為堂室

虛秀洞去城差遠大石室面平野室左右皆有徑隧各  
數十百步穿透兩傍亦臨平野以上所紀皆附郭可日  
涉者餘外邑巖洞尚多不可皆到興安石乳洞最勝余  
罷郡時過之上中下亦三洞此洞與棲霞相甲乙他洞

不及也陽朔亦有綉山羅漢白鶴華蓋明珠五洞皆奇  
又聞容州都嶠有三洞天融州有靈巖真仙洞世傳不  
下桂林但皆在瘴地士大夫尤罕到

--	--	--	--	--	--	--	--

桂海金石志

范成大

本草有玉石部專主藥物非療病雖重不錄此篇亦主為方藥所須者

生金出西南州峒生山谷田野沙土中不由礦出也峒民以淘沙為生坏土出之自然融結成顆大者如麥粒小者如麩片便可鍛作服用但色差淡耳欲令精好則重鍊取足色耗去什二三既鍊則是熟金丹竈所須生金故錄其所出

丹砂本草以辰砂為上宜砂次之今宜山人云出砂處與湖北犬牙山北為辰砂南為宜砂地脈不殊無甚分別宜砂老者白色有牆壁如鏡生白石牀上可入煉勢敵辰砂本草圖經乃云宜砂出土石間非白石牀所生即是未識宜砂也別有一種色紅質嫩者名土坑砂乃是出土石間者不甚耐火邕州亦有砂大者數十百兩作塊黑闇少牆壁嚼之紫黛不堪入藥彼人惟以燒取水銀圖經又云融州亦有砂今融州元無砂邕融聲相



近蓋誤云

水銀以邕州溪洞朱砂末之入鑪燒取極易成以百兩  
為一銚銚之制以猪胞為骨外糊厚紙數重貯之不漏  
鍾乳桂林接宜融山中洞穴至多勝連州遠甚余遊洞  
親訪之仰視石脈湧起處即有乳牀如玉雪石液融結  
所為也乳牀下垂如倒數峯小山峯端漸銳且長如水  
柱柱端輕薄中空如鵝管乳水滴瀝未已且滴且凝此  
乳之最精者以竹管仰盛折取之鍊治家又以鵝管之

端尤輕明如雲母爪甲者為勝

銅邕州右江州峒所出掘地數尺即有礦故蠻人好用  
銅器

綠銅之苗也亦出右江有銅處生石中質如石者名石  
綠又有一種脆爛如碎土者名泥綠品最下價亦賤  
滑石桂林屬邕及瑤洞中皆出有白黑二種功用相似  
初出如爛泥見風則堅又謂之冷石土人以石灰巧鑿  
及未乾時以滑石末拂拭之光瑩如玉

鉛粉桂州所作最有名謂之桂粉其粉以黑鉛著糟甕  
罨化之

無名異小黑石子也桂林山中極多一包數百枚

石梅生海中一叢數枝橫斜瘦硬形色真枯梅也雖巧  
工造作所不能及根所附著如覆菌或云本質為海水  
所化如石蟹石蝦之類

石栢生海中一幹極細上有一葉宛是側栢扶疎無小  
異根所附著如烏藥大抵皆化為石矣此與石梅雖未

詳可以入藥否然皆奇物不可不志

桂海香志

范成大

南方火行其氣炎上藥物所賦皆味辛而嗅香如沈  
箋之屬世專謂之香者又美之所鍾也世皆云二廣  
出香然廣東香乃自舶上來廣右香產海北者亦凡  
品惟海南最勝人士未嘗落南者未必盡知故著其  
說

沈水香上品出海南黎峒一名土沈香少大塊其次如  
繭栗角如附子如芝菌如茅竹葉者佳至輕薄如紙者

入水亦沈香之節因久蟄土中滋液下流結而為香採  
時香面悉在下其背帶木性者乃出土上環島四郡界  
皆有之悉冠諸蕃所出又以出萬安者為最勝說者謂  
萬安山在島正東鍾朝陽之氣香尤醞藉豐美大抵海  
南香氣皆清淑如蓮花梅英鶯梨蜜脾之類焚一博投  
許氣翳彌室翻之四面悉香至煤爐氣不焦此海南香  
之辨也北人多不甚識蓋海上亦自難得省民以牛博  
之於黎一牛博香一擔歸自差擇得沈水十不一二中

州人士但用廣州船上占城真臘等香近年又貴丁流  
眉來者余試之乃不及海南中下品舶香往往腥烈不  
甚腥者意味又短帶木性尾煙必焦其出海北者生交  
趾及交人得之海外蕃舶而聚于欽州謂之欽香質重  
實多大礧氣尤酷烈不復風味惟可入藥南人賤之  
蓬萊香亦出海南即沈水香結未成者多成片如小笠  
及大菌之狀有徑一二尺者極堅實色狀皆似沈香惟  
入水則浮剗去其背帶木處亦多沈水

鷓鴣斑香亦得之于海南沈水蓬萊及絕好箋香中槎  
牙輕鬆色褐黑而有白斑點點如鷓鴣臆上毛氣尤清  
婉似蓮花

箋香出海南香如蛭皮栗蓬及漁蓑狀蓋脩治時雕鏤  
費工去木留香刺棘森然香之精鍾於刺端芳氣與他  
處箋香夔別出海北者聚於欽州品極凡與廣東舶上  
生熟速結等香相埒海南箋香之下又有重漏生結等  
香皆下色



光香與箋香同品第出海北及交趾亦聚於欽州多大  
硯如山石枯槎氣麤烈如焚松檜曾不能與海南箋香  
比南人常以供日用及常程祭享

沈香出交趾以諸香草合和蜜調如薰衣香其氣溫磨  
自有一種意味然微昏鈍

香珠出交趾以泥香捏成小巴豆狀琉璃珠間之綵絲  
貫之作道人數珠入省地賣南中婦人好帶之

思勞香出日南如乳香厯青黃褐色氣如楓香交趾人

用以合和諸香

排草出日南狀如白茅香芬烈如麝香亦用以合香諸草香無及之者

檳榔苔出西南海島生檳榔木上如松身之艾納單熟極臭交趾人用以合泥香則能成溫磨之氣功用如甲香

橄欖香橄欖木脂也狀如黑膠飴江東人取黃連木及楓木脂以為攪香蓋其類出于橄欖故獨有清烈出塵

之意品格在黃連楓香之上桂林東江有此果居人采香賣之不能多得以純脂不雜木皮者為佳

零陵香宜融等州多有之土人編以為蓆薦坐褥性煖宜人零陵今永州實無此香



桂海酒志 范成大

余性不能酒士友之飲少者莫余若而能知酒者亦莫余若也頃數仕于朝游王公貴人家未始得見名酒使北至燕山得其宮中酒號金蘭者乃大佳燕西有金蘭山汲其泉以釀及來桂林而飲瑞露乃盡酒之妙聲震湖廣則雖金蘭之勝未必能頡頏也

瑞露帥司公厨酒也經撫廳前有井清冽汲以釀遂有名今南庫中自出一泉近年只用庫井酒仍佳

古辣泉古辣本賓橫間墟名以墟中泉釀酒既熟不煮  
埋之地中日足取出

老酒以麥麴釀酒密封藏之可數年士人家尤貴重每  
歲臘中家家造鮓使可為卒歲計有貴客則設老酒冬  
鮓以示勤婚娶亦以老酒為厚禮

桂海器志

范成大

南州風俗獠雜蠻獠故凡什器多詭異而外蠻兵甲之製亦邊備之所宜知者

竹弓以簾竹為之筋膠之制一如角弓惟揭箭不甚力  
黎弓海南黎人所用長弰木弓也以藤為弦箭長三尺  
無羽鏃長五寸如茨菰葉以無羽故射不遠三四丈然  
中者必死

蠻弩諸峒獠及西南諸蕃其造作略同以硬木為弓椿

甚短似中國獵人射生弩但差大耳

猛人弩又名編架弩無箭槽編架而射也

藥箭化外諸蠻所用弩雖小弱而以毒藥濡箭鋒中者立死藥以蛇毒草為之

蠻甲惟大理國最工甲冑皆用象皮胸背各一大片如龜殼堅厚與鐵等又聯綴小皮片為披膊護項之屬製如中國鐵甲葉皆朱之兜鍪及甲身內外悉朱地間黃黑漆作百花蟲獸之文如世所用犀毗器極工妙又以



小白貝纍纍絡甲縫及裝兜鍪疑猶傳古貝冑朱綬遺製云

黎兜鍪海南黎人所用以藤織為之

雲南刀即大理所作鐵青黑沈沈不銹南人最貴之以象皮為鞘朱之上亦畫犀毗花文一鞘兩室各函一刀鞘以皮條纏束貴人以金銀絲

峒刀兩江州峒及諸外蠻無不帶刀者一鞘二刀與雲南同但以黑漆雜皮為鞘

黎刀海南黎人所作刀長不過一二尺靶乃三四寸織細藤纏束之靶端揷白角片尺許如鴿鶚尾以為飾

蠻鞍西南諸蕃所作不用韉但空垂兩木鐙鐙之狀刻如小龕藏足指其中恐入榛棘傷足也後鞦鋌木為大錢累累貫數百狀如中國騾驢鞦

蠻鞭刻木節節如竹根朱墨間漆之長纔四五寸其首有鐵環貫二皮條以策馬

花腔腰鼓出臨桂職田鄉其土特宜鼓腔村人專作窩

燒之油畫紅花紋以為飾

銅鼓古蠻人所用南邊土中時有掘得者相傳為馬伏波所遺其製如坐墩而空其下滿鼓皆細花紋極工緻四角有小蟾蜍兩人舁行以手拊之聲全似鞀鼓

鉦鼓徭人樂狀如腰鼓腔長倍之上銳下侈亦以皮鞣植于地坐拊之

盧沙徭人樂狀類簫縱八管橫一管貫之

胡盧笙兩江峒中樂

藤合屈藤盤繞成样合狀漆固護之出藤梧等郡

雞毛筆嶺外亦有兔然極少俗不能為兔毫筆率用雞毛其鋒踉蹌不聽使

練子出兩江州峒大略似苧布有花紋者謂之花練土人亦自貴重

綖亦出兩江州峒如中國線羅上有徧地小方勝紋蠻種出西南諸蕃以大理者為最蠻人晝披夜卧無貴賤人有一氊

黎幕出海南黎峒人得中國錦綵折取色絲間木綿挑織而成每以四幅聯成一幕

黎單亦黎人所織青紅間道木綿布也桂林人悉買以為卧具

檳榔合南人既喜食檳榔其法用石灰或蜆灰并扶留藤同咀則不澀土人家至以銀錫作小合如銀錠樣中為三室一貯灰一貯藤一貯檳榔

鼻飲杯南人習鼻飲有陶器如杯椀旁植一小管若瓶

嘴以鼻就管吸酒漿暑月以飲水云水自鼻入咽快不可言邕州人已如此記之以發覽者一胡盧也

牛角杯海旁人截牛角令平以飲酒亦古兕觥遺意蠻梳以木刻朱黑間漆之侈腹而有足如敦瓠之形

竹釜猺人所用截大竹筒以當鑪鼎食物熟而竹不燬蓋物理自爾非異也

戲面桂林人以木刻人面窮極工巧一枚或值萬錢

桂海禽志

范成大

南方多珍禽非君子所問又余以法禁采捕甚急故不能多識偶於人家見之及有異聞者錄以備博物孔雀生高山喬木之上人探其雛育之喜卧沙中以沙自浴拍拍甚適雄者尾長數尺生三年尾始長歲一脫尾夏秋復生羽不可近目損人飼以猪腸及生菜惟不食菰

鸚鵡近海郡尤多民或以鸚鵡為鮓又以孔雀為腊皆

以其易得故也此二事載籍所未紀自余始志之南人  
養鸚鵡者云此物出炎方稍北中冷則發瘴噤戰如人  
患寒熱以柑子飼之則愈不然必死

白鸚鵡大如小鶩亦能言羽毛玉雪以手撫之有粉粘  
著指掌如蛺蝶翅

烏鳳如喜雀色紺碧頸毛類雄雞髻頭有冠尾垂二弱  
骨各長一尺四五寸其杪始有毛羽一簇冠尾絕異大  
畧如鳳鳴聲清越如笙簫然度曲妙合宮商又能為百



蟲之音生左右江溪峒中極難得然書傳未之紀當由人罕識云

秦吉了如鸛鵒紺黑色丹味黃距目下連頂有深黃文頂毛有縫如人分髮能人言比鸚鵡尤慧大抵鸚鵡如兒女吉了聲則如丈夫出邕州溪洞中唐書林邑出結遼烏林邑今占城去邕欽州但隔交趾疑即吉了也錦雞又名金雞形如小雉湖南北亦有之

山鳳皇狀如鷺鴈嘴如鳳巢兩江深林中伏卵時雄者

以木枝雜桃膠封其雌于巢獨留一竅雄飛求食以飼之子成即發封不成則窒竅殺之此亦異物然未之見也

翻毛鷄翮翎皆翻生彎彎向外尤馴狎不散逸二廣皆有

長鳴雞高大過常雞鳴聲甚長終日啼號不絕生邕州溪洞中

翡翠出海南邕賀二州亦有腊而賣之

灰鶴大如鶴通身灰慘色去頂二寸許毛始丹及頸之半亦能鳴舞

鷓鴣大如竹雞而差長頭如鷄身文亦然惟臆前白點正圓如珠人采食之

水雀蒼色似鶴鷄飛集戶庭翩翩然與燕雀為伍

--	--	--	--	--	--	--	--

桂海獸志

范成大

獸莫巨於象莫有用于馬皆南土所宜余治馬政頗  
補苴漏隙其說累牘所不能載姑著其略及畜獸稍  
異者併為一篇

象出交趾山谷惟雄者則兩牙佛書云四牙又云六牙  
今無有

蠻馬出西南諸蕃多自毗那自杞等國來自杞取馬於  
大理古南詔也地連西南馬生尤蕃

大理馬為西南蕃之最

果下馬土產小駟也以出德慶之瀧水者為最高不踰三尺駿者有兩脊骨故又號雙脊馬健而喜行

獬有三種金絲者黃玉面者黑純黑者面亦黑金絲玉面皆難得或云純黑者雄金絲者雌又云雄能嘯雌不能也獬性不耐著地著地輒瀉以死煎附子汁飲之即愈

蠻犬如獵狗警而狔

鬱林犬出鬱林州極高大垂耳拳尾與常犬異

花羊南中無白羊多黃褐白斑如黃牛又有一種深褐黑脊白斑全似鹿

乳羊本出英州其地出仙茅羊食茅舉體悉化為肪不復有血肉食之宜人

綿羊出邕州溪洞及諸蠻國與朔方羊不異

麝香自邕州溪洞來者名土麝氣臊烈不及西蕃

火狸狸之類不一邕別有一種其毛色如金錢豹但其

錢差大耳彼人云歲久則化為豹其文先似之矣

風狸狀似黃猿食蜘蛛晝則拳曲如蛭遇風則飛行空中其溺及乳汁主大風疾奇效

嬾婦如山猪而小喜食禾田夫以機軸織紝之器掛田所則不復近安平七源等州有之

山猪即豪猪身有棘刺能振發以射人三二百為羣以害禾稼州洞中甚苦之

石鼠專食山豆根賓州人以其腹乾之治咽喉疾効如



神謂之石鼠肚

香鼠至小僅如指掌大穴于柱中行地中疾如激箭

山獺出宜州溪洞俗傳為補助要藥洞人云獺性淫毒  
山中有此物凡牝獸悉避去獺無偶抱木而枯洞獠尤  
貴重云能解藥箭毒中箭者研其骨少許傳治立消一  
枚直金一兩人或求買但得殺死者功力甚劣

--	--	--	--	--	--	--	--

桂海蟲魚志

范成大

蟲魚微物外薄于海者其類庸可既哉錄偶見聞者

萬一

珠出合浦海中有珠池蜃戶投水採蚌取之歲有豐耗  
多得謂之珠熟相傳海底有處所如城郭大蚌居其中  
有怪物守之不可近蚌之細碎蔓延於外者始得而采  
車磔似大蚌海人磨治其殼為諸玩物

蚺蛇大者如柱長稱之其膽入藥南人腊其皮刮去鱗

以鞞鼓蛇常出逐鹿食寨兵善捕之數輩滿頭插花趨  
赴蛇蛇喜花必駐視漸近競拊其首大呼紅娘子蛇頭  
益挽不動壯士大刀斷其首衆悉奔散遠伺之有頃蛇  
省覺奮迅騰擲傍小木盡拔力竭乃斃數十人昇之一  
村飽其肉

蝟蟬形似龜龜輩背甲十三片黑白斑文相錯鱗差以  
成一背其邊裙闊闊嚙如鋸齒無足而有四鬣前兩鬣  
長狀如櫂後兩鬣極短其上皆有鱗甲以四鬣擢水而

行海人養以鹽水飼以小鱗俗傳甲子庚申日輒不食  
謂之螭蝟齋日其說甚俚

蜈蚣有極大者

青螺狀如田螺其大兩拳揩磨去麤皮如翡翠色雕琢  
為酒杯

鸚鵡螺狀如蝸牛殼磨治出精采亦雕琢為杯

貝子海傍皆有之大者如拳上有紫斑小者指面大白  
如玉

石蟹生海南形負是蟹云是海沫所化理不可詰又有石蝦亦其類

鬼蛺蝶大如扇四翅好飛荔枝上

黑蛺蝶大如扇橘蠹所化北人云玄武蟬

嘉魚狀如小鮓魚多脂味極腴美出梧州火山人以為鮓餉遠

蝦魚出灘水肉白而豐味似蝦而鬆美

竹魚出灘水狀似青魚味如鰕魚南中魚品如鯉鯽輩

皆有之而以蝦竹二魚為珍

天蝦狀如大飛蟻秋社後有風雨則羣墮水中有小翅  
人候其墮掠取之為鮓





桂海花志

范成大

桂林具有諸草花木牡丹芍藥桃杏之屬但培養不力存形似而已今著其土產獨宜者凡北州所有皆不錄

上元紅深紅色絕似紅木瓜花不結實以燈夕前後開故名

白鶴花如白鶴立春開

南山茶葩萼大倍中州者色微淡葉柔薄有毛別自有

一種如中州所出者

紅荳蔻花叢生葉瘦如碧蘆春末發初開花先抽一輪  
有大籜包之籜解花見一穗數十蕊淡紅鮮妍如桃杏  
花色蕊重則下垂如蒲萄又如火齊纓絡及剪綵鸞枝  
之狀此花無實不與草荳蔻同種每蕊心有兩瓣相並  
詞人托興曰比目連理云

泡花南人或名柚花春末開蕊圓白如大珠既拆則似  
茶花氣極清芳與茉莉素馨相逼番人采以蒸香風味

超勝

紅蕉花葉瘦類蘆箬心中抽條條端發花葉數層日折  
一兩葉色正紅如榴花荔子其端各有一點鮮綠尤可  
愛春夏開至歲寒猶芳又有一種根出土處特肥飽如  
膽餅名膽餅蕉

枸那花葉瘦長畧似楊柳夏開淡紅花一朶數十萼至  
秋深猶有之

史君子花蔓生作架植之夏開一簇一二十葩輕盈似

海棠

水西花葉如萱草花黃夏開

裏梅花即木槿有紅白二種葉似蜀葵采紅者連葉包裏黃梅鹽漬暴乾以薦酒故名玉修花粉紅色四季開象蹄花如梔子而葉小夏開至秋深

素馨花比番禺所出為少當由風土差寒故也

茉莉花亦少如番禺以浙米漿日漑之則作花不絕可耐一夏花亦大且多葉倍常花六月六日又以治魚腥

水一溉益佳

石榴花南中一種四季常開夏中既實之後秋深忽又大發花且實枝頭碩果罅裂而其旁紅英粲然併花實折飭盤筵極可玩

漆色芙蓉花晨開正白午後微紅夜深紅

側金盞花如小黃葵葉似槿歲暮開與梅同時



桂海果志

范成大

世傳南果以子名者百二十半是山野間草木實猿狙之所甘人強名以為果故余不能盡識錄其識可食者五十五種

荔枝自湖南界入桂林纔百餘里便有之亦未甚多昭平出頰核臨賀出綠色者尤勝自此而南諸郡皆有之悉不宜乾肉薄味淺不及閩中所產

龍眼南州悉有之極大者出邕州圍如當二錢但肉薄

不能遠過常品為可恨

饅頭柑近蒂起饅頭尖者味香勝可埒永嘉孔柑

金橘出營道者為天下冠出江浙者皮甘肉酸不逮矣  
綿李味甘美勝常品擘之兩片開如離核桃

石栗圓如彈子每顆有梗抱附之類杓柄肉黃白甘  
似巴欖子仁附肉有白靨不可食發病北人或呼為海  
胡桃

龍荔殼如小荔枝肉味如龍眼木身葉亦似二果故名



可蒸食不可生啖令人發癰或見鬼物三月開小白花  
與荔枝同時

木竹子皮色形狀全似大枇杷肉甘美秋冬間實

冬桃狀如棗深碧而光軟爛甘酸春夏熟

羅望子殼長數寸如肥皂又如刀豆色正丹內有二三  
實煨食甘美

人面子如大梅李核如人面兩目鼻口皆具肉甘酸宜  
蜜煎

烏欖如橄欖青黑色肉爛而甘

方欖亦橄欖類三角或四角出兩江州洞

椰子木身葉悉類椶櫚枕榔之屬子生葉間一穗數枚  
枚大如五升器果之大者謂惟此與波羅蜜等耳皮中  
子殼可為器子中瓢白如玉味美如牛乳瓢中酒新者  
極清芳久則渾濁不堪飲

蕉子芭蕉極大者凌冬不凋中抽幹長數尺節節有花  
花褪葉根有實去皮取肉軟爛如綠柿極甘冷四季實

土人或以飼小兒云性涼去客熱以梅汁漬暴乾按令扁味甘酸有微霜世所謂芭蕉乾者是也又名牛子蕉雞蕉子小如牛蕉亦四季實

芽蕉子小如雞蕉尤香嫩甘美秋初實

紅鹽草果取生草荳蔻入梅汁鹽漬令色紅暴乾以薦酒

鸚鵡舌即紅鹽草果之珍者實始結即頻取紅鹽乾之纔如小舌

八角茴香北人得之以薦酒少許咀嚼甚芳香出左右  
江州洞中

餘甘子多販入北州人皆識之其木可以制器

五梭子形甚詭異瓣五出如田家碌碡狀味酸久嚼微  
甘閩中謂之羊桃

黎朦子如大梅復似小橘味極酸

波羅蜜大如冬瓜外膚礪礪如佛髻削其皮食之味極  
甘子練悉如冬瓜生大木上秋熟

柚子南州名臭柚大如瓜人亦食之皮甚厚打碑者卷皮蘸墨以代氈刷宜墨而不損紙極便于用此法可傳但北州無許大柚耳

櫓罌子大如半升椀諦視之數十房攢聚成毬每房有縫冬生青至夏紅破其瓣食之微甘

槎櫟子如錐栗肉甘而微澀

地蠶生土中如小蠶又似甘露子

赤柚子如橄欖皮青肉赤以下並春實

火炭子如烏李

山韶子色紅肉如荔枝以下八種並夏實

山龍眼色青肉如龍眼

部諦子色黃如大石榴

木賴子如淡黃大李

粘子如指面大褐色

羅晃子如橄欖其皮七重

千歲子如青黃李味甘

赤棗子如酸棗味酸

藤韶子大如鳬卵柿以下十三種並秋實

古米子殼黃中有肉如米粒

穀子如青梅味甘

藤核子生白藤上如小蒲桃

木連子如胡桃紫色

蘿蒙子黃如大橙柚

毛栗如橡栗

特乃子狀似榧而圓長端正

不納子似黃熟小梅絕易爛爛即破肉附核可為經珠似菩提子

羊矢子色狀全似羊矢味亦不佳

日頭子狀如櫻桃色如蒲桃穗棟子

秋風子色狀俱似棟子

黃皮子如小棗

朱圓子正圓深紅狀如棟子以下六種皆冬實



匾桃大如桃而匾色正青

粉骨子皮黃色如粉

塔骨子匾如大橘皮裏空虛

布衲子似李而黃

黃肚子如小石榴



桂海草木志

范成大

異草瑰木多生窮山荒野其不中醫和匠石者人亦  
不采故余所識者少惟竹品乃多桀異併附于錄

桂南方奇木上藥也桂林以桂名地實不產而出于賓  
宜州凡木葉心皆一縱理獨桂有兩紋形如圭製字者  
意或出此葉味辛甘與皮無別而加芳美人喜咀嚼之  
榕易生之木又易高大可覆數畝者甚多根出半身附  
榦而下以入土故有榕木倒生根之語禽鳥銜其子寄

生他木上便蔚茂根下至地得土氣久則過其所寄

沙木與杉同類尤高大葉尖成叢穗少與杉異

枕榔木身直如杉又如梭欄有節似大竹一榦挺上高  
數丈開花數十穗綠色

思偶木生兩江州峒堅實漬鹽水中百年不腐

臘脂木堅緻色如臘脂可鑢作出融州及州峒桂林屬  
縣亦有之

雞桐葉如楝其葉煮湯療足膝疾

龍骨木色翠青狀如枯骨

風膏藥葉如冬青治太陽疼頭目昏眩

南漆如稀飴氣如松脂霑霑無力

蕩竹葉大且密畧如蘆葦

澀竹膚麤澀如木工所用砂紙可以錯磨爪甲

人面竹節密而凸宛如人面人採為拄杖

釣絲竹類蕩竹枝極柔弱

斑竹中有疊暈江浙間斑竹直一淚痕無暈也

貓頭竹質性類筍竹

桃枝竹多生石上葉如小椶櫚人以大者為杖

筍竹刺竹也芒棘森然

箭竹山中悉有

宿根茹茹本不凋明年結實

銅鼓草其實如瓜療瘡瘍毒

大蒿容梧道中久無霜雪處年深滋長大者可作屋柱

小亦中肩輿之杠

石髮出海上纖長如絲縷

匾菜細如荇蒂匾如薤菜長一二尺

都管草一莖六葉辟蜈蚣蛇

花藤鋌以為器用中有花紋

胡蔓藤毒草也搽其草漬之水入口即死

--	--	--	--	--	--	--	--



桂海雜誌

范成大

嶠南風土之異宜錄以備博聞而不可以部居謂之  
雜誌

雲南州多無雪霜草木皆不改柯易葉獨桂林歲歲得  
雪或臘中三白然終不及北州之多靈川興安之間兩  
山蹲踞中容一馬謂之嚴關朔雪至關輒止大盛則度  
關至桂林城下不復南矣

風廣東南海有颶風西路稍北州縣悉無之獨桂林多



風秋冬大甚拔木飛瓦晝夜不息俗傳朝作一日止暮  
七日夜半則彌旬去海猶千餘里非颶也土人自不知  
其說余試論之桂林地勢視長沙番禺在千丈之上高  
而多風理固然也

癸水桂林有古記父老傳誦之畧曰癸水繞東城永不  
見刀兵癸水灘江也

瘴二廣惟桂林無之自是而南皆瘴鄉矣瘴者山嵐水  
毒與草莽沴氣鬱勃蒸薰之所為也其中人如瘧狀治

法雖多常以附子為急須不換金正氣散為通用邕州  
兩江水土尤惡一歲無時無瘴春曰青草瘴夏曰黃梅  
瘴六七月曰新禾瘴八九月曰黃茅瘴土人以黃茅瘴  
為尤毒

桂林舊不知所在城北五里有尋丈小坡立石其上刻曰桂  
嶺賀州自有桂嶺縣相傳始名嶺在其地今小坡非也

俗字邊遠俗陋牒訴券約專用土俗書桂林諸邑皆然  
今姑記臨桂數字雖甚鄙野而偏傍亦有依附音不

長也閨

音穩

坐于門中穩也奎

音穩

大坐亦穩也似

音小

兒也天

音動

人瘦弱也至

音終

人亡絕也孺

音臘

不能舉足也

妖

音大

女大及姊也丑

音劬

山石之巖窟也門

音據

門橫闢也

他不能悉紀余閱訟牒二年習見之大理國間有文書

至南邊及商人持其國佛經題識猶有用囹字者囹武

后所作國字也唐書有大禮國今其國止用理字

捲伴南州法度疎畧婚姻多不正村落強暴竊人妻女

以逃轉移他所安居自若謂之捲伴言捲以為伴侶也

已而復為後人捲去至有歷數捲未已者其舅姑若前夫訪知所在詣官自陳官為追究往往所謂前夫亦是捲伴得之復為後人所捲惟其親父母兄弟及初娶者所訴即歸始初被捲之家

草子即寒熱時疫南中吏卒小民不問病源但頭痛體不佳便謂之草子不服藥使人以小錐刺唇及舌尖出血謂之挑草子實無加損于病必服藥乃愈



桂海蠻志

范成大

廣西經畧使所領二十五郡其外則西南諸蠻蠻之  
區落不可殫記姑記其聲問相接帥司常有事于其  
地者數種曰羈縻州洞曰徭曰蠻曰黎曰蜚通謂之  
蠻

羈縻州洞隸邕州左右江者為多舊有四道徭氏謂安  
平武勒忠浪七源四州皆徭姓又有四道黃氏謂安德  
歸樂露城田州皆黃姓又有武侯延衆石門感德四鎮

之民自唐以來內附分析其種落大者為州小者為縣  
又小者為洞國朝開拓寢廣州縣洞五十餘所推其雄  
長者為首領籍其民為壯丁其人物獷悍風俗荒怪不  
可盡以中國教法繩治姑羈縻之而已有知州權州監  
州知縣知洞其次有同發遣權發遣之屬謂之主戶餘  
民皆稱提陀猶言百姓也其田計口給民不得典賣惟  
自開荒者由已謂之祖業口分田知州別得養印田猶  
圭田也權州以下無印記者得蔭免田既各服屬其民



又以攻剽山獠及博買嫁娶所得生口男女相配給田使耕教以武技世世隸屬謂之家奴亦曰家丁民戶強壯可教勸者謂之田子田丁亦曰馬前牌總謂之洞丁今黃姓尚多而儂姓絕少智高亂後儂氏善良許從國姓今多姓趙氏有舉洞純一姓者婚姻不以為嫌酋豪或娶數妻皆曰媚娘宜州管下亦有羈縻州縣十餘所其法制尤疏幾似化外其尤者曰南丹州待之又與他州洞不同特命其首領莫氏曰刺史月支鹽料及守臣

供給錢其說以謂宜州徼外即唐黃家賊之世崇建南

丹使控制之莫氏家人亦有時

缺

延甚

逐其弟延廩而自立延廩奔朝廷謂之

缺

宋

凡州洞歸明者皆謂

之缺  
宋

猛本五溪槃瓠之後其壤

缺

靜江之興

缺

寧

古縣融州之融水懷遠縣界皆有之生深山重嶺中椎  
髻跣足不供征役各以其遠近為伍

獠在右江溪洞之外俗謂之山獠依山林而居無酋長

版籍蠻之荒忽無常者也以射生食動而活蟲豸能蠕動者皆取食無年甲姓名一村中惟有事力者曰郎火餘但稱火舊傳其類有飛頭鑿齒鼻飲白衫花面赤禪之屬二十一種今在江西南一帶甚多殆百餘種也


蠻南方曰蠻今郡縣之外羈縻州洞雖故皆蠻地猶近省民供稅役故不以蠻命之遇羈縻則謂之化外真蠻矣區落連亘接于西戎種類殊詭不可勝記今志其近桂林者宜州有西南蕃大小張大小王龍石滕謝諸蕃

地與牂牁接人椎髻跣足或著木履衣青花斑布以射獵讐殺為事又南連邕州南江之外者羅殿自杞等以國名羅孔特磨白衣九道等以道名而戎州以西別有酋長無所統屬者蘇綺羅坐夜面計利流求萬壽多嶺阿悞等蠻謂之生蠻酋自謂太保大抵與山獠相似但有首領耳羅殿等處乃成聚落亦有文書公文稱守羅殿國王其外又有大蠻落西曰大理東曰交趾大理南詔國也交趾古交州治龍編又為安南都護府

黎海南四郡隰上蠻也隰直雷州由徐聞渡半日至隰  
之中有黎母山諸蠻環居四傍號黎人山極高常在霧  
靄中黎人自鮮識之久晴海氣清廓時或見翠尖浮半  
空云蠻皆椎髻跣足挿銀銅錫釵婦人加銅環耳墜垂  
肩女及笄即黥頰為細花紋謂之繡面女既黥集親客  
相慶賀惟婢獲則不繡面四郡之人多黎姓蓋其裔族  
而今黎人乃多姓王

蜃海上水居蠻也以舟楫為家採海物為生且生食之

入水能視合浦珠池蚌蛤惟蜃能沒水探取旁人以繩  
繫其腰繩動搖則引而上先煮毳衲極熱出水急覆之  
不然寒慄而死或遇大魚蛟鼉諸海怪為髻鬣所觸往  
往潰腹折支人見血一縷浮水面知蜃死矣



說郛卷六十二上